



Basler Dylbi

Duubeschlag

Fasnacht 2019

Mer geen dr Bach ab

Wenn's aim z Basel nimm wool isch
gitts en Usspruch - ganz symbolisch
isch irgendetwas blyybe hange
no sait me: s isch dr Bach ab gange !
mit Bach do maint me denn dr Rhy
und gumpt doch zerscht grad sälber dry
bym Rhyschwumm do bisch nit ellai
hesch mängmool s Gfiihl, s blybt kain dehai
s letscht Joor seesch säxdausig zämme
Arsch an Arsch - dr Bach ab schwämme
d Chemie, die haltet s Wasser gsund
dangg em Wiggelfisch laufts rund
mit Kind und Kegel - Katz und Hund
sogar die halb Regierig kunnt
das gittt e Trybe - scheen und bunt
und kaine dänggd was als fyr Schund
so fyre kunnt vom Undergrund
wenn me dr Bach butzt, Stund fyr Stund
Händy, Schruube, Absperrgitter
e Badeaazug vomene Zwitter
Fläsche, Däsche, leeri Doose
Büschtehalter, Unterhoose
denn findet me e Flaischermässer
vo däm sait schints e Heer Profässser
dass s'Alter hundetdausig Joor isch
und wenn au numme d Helfti woor isch
s'gheert ins Museum, ins historisch
derzue kunnt uss em Bach no z rugele
e 500jörigi Kanonekugele
und uss all däm wird - wär heft do glacht
e Spezialusstellig gmacht
fyr ganz bsundre alte Misch
zum Thema «Uffdaucht-uusegfishcht»
Flugzüg hetts no kaini dunde
aber Auti hesch scho gfunde
Velo hetts nadürlig au
und ab und zue suecht ain sy Frau
jä, unsri Gsellschaft wird nit emool root
ab däm wo alles dr Bach ab goot
und s'git au fascht nyt mee - seesch es yy
wo nit scho könnt dr Bach ab sy...
aber mer sinn jo au beschrens drmit verdraut
was sich sunscht no so alles zämmebraut
wo s'denn au no symbolisch dr Bach ab haut
sicher wänn er dervo e baar Bischbill gsee:
Dr Bach ab - ständig - es duet aim fascht weh
goots immer mee - mit dr BVB
s vergoot kai Dag mee, s isch zum Hyyle
ohni Drämmli-Negativ-Schlagzyyle
me muess scho fascht saage: Drämmli, Drämmli
du gosch bald ganz dr Bach ab - nämmli !
die alte no guete geen gratis in Oschte
denn goot me die falsche neye go boschte
wo, bevor me weiss, was sy gnau dien koschte,
scho in dr Verpaggig afeen roschte
und Reeder erscht repariert, s isch zum Griine
basse sy scho nimm in d Schienen yne...
Dangg de hooche Trottoir gäbs bym Usstiege kuum ebbis z murre
die Behinderete käme jetz ändlig glaar besser duure
drfyr kheye alli andre bym Dryberlaufe uff d Schnuure!
Au zymmlig rasch dr Bach durab
goot d Mäss Basel - und das nit z knapp
kuum hett me die Riese-Halle baut
hett sich bald kain mee ynegetraut...
d MUBA die isch gar nimm doo
und d Basel World hett d Schwindsucht bikoo
vorhäär schwillt immer heeher im Kamm sy Kamm
jetz isch er entglaist - au fascht wie ne Dram
und au dr Bach ab goot mee und mee
dr 125-jörige FCB
in dr Fiehrig hogge die falsche Pfludde
in dr Mannschaft ka kain me so richtig schutte
und hänn sy scho Mieh mit dr Gegewart
so wird's jetz gli ganz bsunders hart
denn ohni s Sportmuseum - s duet ys laid
fäält im FCB jetz au d Vergangehait...
Fyr en andri isch's meeglicherwyys au gly z spoot
will sy in de Wälle vom Bach langsam undergoot
s'isch d Frau Ackermä, die hett Brobleem ganz e Huffe
scho im kulturelle Huffe kennt sy bald versueche
vyllicht wärde d Wälle fyr dr Wessels au gly z hooch
und e Rettigsring wirft däm glaub kaine nooch..
d'Parkgebühre hilft er yzzieh - y glaub y spinn
wo nonig emoll in Kraft gsetzt sinn...
Bachab goot hitt au dr Begriff «normal»
denn alles zellt numme no digital
Vom Morge frieh bis zoobe spoot
druggsch di uff dym Käschtle z dood
und stellsch fescht - erbitteret
S wird nimm mitnand gschwätzt - s wird twitteret
«Face» haisst zwoor Gsicht und «Book» haisst Buech
aber hänggd me's zämme, denn isch's e Fluech
alles wirgglig Perseenligi - isch blyybe hange
und digital dr Bach ab gange....
Statt dr Bach durab, s macht ys aber au muff
hauts d'BAZ zur Tarmedia - zwoor ehnder duruff
aber denn schwemmts ganz sicher, es macht ys schlapp
alles Lokali erscht rächt dr Bach ab
D Novartis baut am Bach sich uff
kuum uffbaut, macht sy alli muff
Shareholder value, managemänt
das isch das, wo zellt emänt
d Biezer ergere sich do drab
und Zwaidausig Stelle - doch bachab
Denn kunnt no dä Tesla, also das isch doch, gall
au sone ussgsproches «Bach-ab-Modäll»
fyr d Basler Schugger isch dä doch vyl z schnäll !
denn by drissig innerorts -s'isch doch esoo
statt d Gauner z'verwütsche, faart me dääne dervoo...
So kennt langsam wirgglig dr Ydrugg entstoo
s'goot jo alles dr Bach ab - sowieso
aber mir wänn ys doo - nit aastegge loo
isch au ganz e Huffe - scho fascht am Versuffe
d Hauptsach isch doch - mir mache sälber nit schlapp
und unsri Fasnacht goot au «bis z'letscht» nit bachab !

Und wenn de sälber nooni dr Bach ab bisch, noo goosch an d'Usstellig
vo de Lampe bym Münster und vo de Requisite by der Kasärne
(Mäntig zoobe bis Mittwoch demorge)